

Ovim riječima oficijelnog čelnika zemlje-domaćina XIV ZOI, prethodilo je sinoć u raskošno uređenom sarajevskom Narodnom pozorištu u maniru i proceduri rafiniranog olimpijskog protokola – proglašenje otvorenom 87. sesije MOK-a od strane domaćeg šefa države (Predsjedništvo SFRJ); sviranje olimpijske himne Spirosa Samarasa, svečana zakletva novih članova MOK-a...

Svoj govor, kao centralni dio sesije, predsjednik MOK-a Huan Antonio Samaran završio je riječima, koje su potom postale okosnicom od ogromnog publiciteta u svijetu i odgovarajućeg nabujalog interesovanja za Sarajevo i njegovu organizaciju XIV ZOI. Samaran je rekao:

*- „...U toku dugogodišnjih priprema dobro smo se upoznali i naučili da poštujemo jedni druge i postali smo pravi prijatelji. Ovo predstavlja jedno od ču-
da našeg pokreta, koji pruža mogućnosti za slična prijateljstva na svim nivoima. Želio bih odati priznanje Republici Bosni i Hercegovini i svim građanima Sarajeva, čiji nas je istinski olimpijski duh zadivio mnogo puta u proteklim godinama. Već izvanredan uspjeh sa rekordnim učešćem 49 nacionalnih olimpijskih komiteta, predstavlja najljepšu nagradu za sve one napore. Nadalje sam uvjeren, kao i svi oni koji su bili u prilici da se već dive prelijepim sportskim objektima koji su napravljeni, da će oni predstavljati izuzetnu stavku u budućem razvoju i ekonomskom prosperitetu ove regije...”*

DIZANJE TEMPERATURE

Ekonomski prosperitet o čemu je sinoć nadahnuto govorio prvi čovjek MOK-a, sam po sebi, kao fenomen, kao šansa, kao izazov, postaje naglo i iznenada u današnjim reakcijama na Samaranove dojmove i ocjene, osobenim referendumom.

U međuvremenu, Olimpijski plamen na svojoj impresivnoj putanji od 5.829 kilometara, od Olimpije do Dubrovnika pa nadalje prešao je sve jugoslovenske republike i pokrajine. Približava se Sarajevu kao svom glavnom i konačnom cilju.

„Zapadni pravac” Olimpijskog plamena prenoćio je u Zagrebu, a potom sutradan na svečan način ispraćen prema Sisku i Bosanskoj krajini. Prilikom boravka u Zagrebu začas se baklja zaustavila na Ilici br. 44, pred kućom na kojoj je otvorena spomen-ploča u znak sjećanja na osnivanje Jugoslovenskog olimpijskog odbora 14. decembra 1919. godine. Plamen zatim nastavlja put preko Bihaća, Jajca, Travnika, Zenice i Kaknja. Sarajevskim ulicama i opštinama proći će svečano 7. februara, da bi istog dana u 17 sati stigao na krajnje odredište – na plato pred Skenderijom.

„Istočni pravac” Olimpijskog plamena dočekan je u Beogradu na impresivan način. Nošen je mnogim beogradskim ulicama i trgovima, da bi mu pred